



Native Women's
Association of Canada

L'Association des
femmes autochtones
du Canada

Gaa-bimiwidoowaad Nibi (Niswe) Giiwitaad-adoopowin

**Gaa-dakwaak Dibaajimowin Dibaajimowin Nibiing Gaa-
onjiimagakin; Anishinaabekweg Ikwezensag Gaa-
niizhoo-achaakewaad gaye Gaa-bakaanenindizowaad
onaanaagadawendaanaawaa e-ani-agaasiinadak nibi.**

onaabani-giizis 2025



Odaanaang

Gaa-bimiwidoowaad Nibi Izhichigewin (NWAC) Anishinaabekweg omaa Canada gaa-onjiwaad gaye Anishinaabe ogimaa gaanada (ISC) gaa-miinigowaad zhooniyaan niigaaniiwag ji-gigidoodamowaad nibi gaye gaa-izhi-ganawenjigaadeg.

Anishinaabewaadiziwin gaye anishinaabewichigewin da-biminizha'igaade naanaagadawenjigaadeg aaniin ezhisemagak nibi omaa gidakiiminaang. Ikwewag inendaagoziwag ji-naagajitoowaad nibi. Phase 1 gaye 2 (2020 – 2024) NWAC gii-wiiji'iwewag ji-dazhinjigaadeg wegonen iwe ikwewag gaa-inendaagoziwaad ji-naagajitoowaad nibi, memindage gii-ani-wiinichigaadeg nibi. Miziwe akiing gaye gii-ayaasigwaa Anishinaabe ishkoniganing gaa-bekaagamik nibi ji-minikwewaad. Niiwin dash gegoonan daa-dazhinjigaadewan aan ge-izhi-ganawenjigaadeg Nibi gaye gikendaasowin gaye Anishinaabeg ezhi-inendaagoziwaad gaye ji-niigaaniwaad Anishinaabeg.

Omaa dash Phase 3 (2024 – 2026) iwe daa-izhichigewag. NWAC niizhing gii-maawaji'iwewag ji-dazhinjigaadeg aaniin anishinaabekweg ge-gii-izhichigewaad ji-izhichigeng gaa-ikidong imaa Phase 2 imaa dazhiikewining gaye inaakonigewining. Omaa dash mazina'iganing wiindamaagem gaa-gii-dazhinjigaadeg ezhiseg iwe nibi gaye gaa-inenjigaadeg anishinabe gikendaasowin.

Gaa-gii-mikigaadeg

- 1. Gaa-izhi-naniizaanadak nibi gaye ezhichigeng ji-zhaabwiiwaad awiyag.** Owe dibaajimowin dibaajimomagam gaa-gii-dazhinjigaadeg gaa-izhiseg gii-naniizaanadag nibi gaye das gaa-izhi-gikendamowaad Anishinaabeg wiinawaa gaa-zhi-badagoshkaagewaad gaa-ogimaawiwaad gaye aaniin ge-izhi-giwe-dibenindizoying. Gaa-izhi-gikendamang e-naniizaanadak nibi gaye ge-izhi-zhaabwiiying. Gaa-gii-dagwiiwaad gii-ikidowag aaniin epiichi-zanagendaagwak emaanzhi-doojigaadeg nibi aaniin ezhi-maanishkaagoying. Ishkoniganing ani-wiinichigaade nibi gaa-ayaamagak zaaga'iganiing gaye ziibiing gii-waamagakin gaa-onji-zhooniyaakenaniwang gaye gii-ozhichigaadeg gegoon. Gi-doonji-aakozimin, gimisadaang omigiiwiwin gaye gaa-amowemagak gaa-zanagak aakoziwin. Mii igi ikwewag gaa-ganawenimaawaad onijjaanisiwaa' gaa-ganawendamowaad nibi odaawiniwaang onaagajitoowaad gaa-akogashkitoowaad. Mii aaniish ezhisewaad jidoodamowaad. Gaawiin dash minosesinon owe ginwesh gaawiin minosesinon gaawiin Anishinaabeg odayaasiinaawaa nibi geminikwewaad.
- 2. Awenenag maawach gaa-maanzhisewaad ishkoniganing.** Gakina gaa-daawaad ishkoniganing omaanishkaagonaawaa gegoon gii-izhiyaag nibi. Gichi-aya'aak gaye



abinoojiizhag gaye gaa-bakaaneninidzowaad gaye gaa-oniijaanisiwaad ikwewag gaye bagwadakamig gaa-ayaawad gaye gaa-gidimaagiziwaad. Anishinaabekweg ozanagendaanaa giishpin gegoon gii-izhiseg nibi aaniish. Mii igi gaa-gichi-anokiiwaad ebaabii'aaawaad awiyan midash wenji-ayekoziwaad. Gichi-ayaag gaawiin ogashkitoosiinaawaa ji-naada'ibiiwaad gaye ji-wanzamowaad nibi, amii dash ge-onji-aakoziwaapan giishpin minikwaadamowaad nibi gaa-wiinaagamig giishpin mowaabo imaa gaa-izhiseg nibiing; gaye abinoojiizhag odaagondaanaawaa nibi gaa-gichi-inemikao. Gaa-niizhoo'achaakewaad gaye gaa-bakaanenindiowaad gaye ozanagendaanaawaa owe gaa-dazhinjigaadeg Gaawiin eta majendaagoziwin gaa-dazhindamowaad, gaa-inendaagoziwying igo ji-inanokiiying gaa-dazhinjigaadeg.

- 3. Anishinaabekweg obimiwidoonaawaa nibi** Anishinaabekweg maawach ozanagi'igowaa giishpin gegoon gii-izhiseg nibi aaniish. Mii igi gaa-gichi-anokiiwaad ebaabii'aaawaad awiyan midash wenji-ayekoziwaad. Gichi-ayaag gaawiin ogashkitoosiinaawaa ji-naada'ibiiwaad gaye ji-wanzamowaad nibi, amii dash ge-onji-aakoziwaapan giishpin minikwaadamowaad nibi gaa-wiinaagamig giishpin mowaabo imaa gaa-izhiseg nibiing; gaye abinoojiizhag odaagondaanaawaa nibi gaa-gichi-inemikao. Igi gaye gaa-niizho-achaakewaad gaye gaa-bakaanenindizowaad ozanagi'igowaa gii-maanaadak nibi gaye igi bagwadakamig gaa-ayaawad omaanishkaagonaawaa gaa-bichiboowang nibi. Gimashkawiziimin gaawiin gimajisesiimin, giinawind aaniish gi-gii-bami'aanaanig igi gaa-ositaawisewaad dazhiikewining giinawind aaniish gigiekendaamin ge-izhichigeying.
- 4. Wiindamawaawag wegimaawiwaad** Wiinawaa ogimaawining gaa-ayaawad gaawiin ominwendaziinaawaa Anishinaabeg igi ogimaag gaa-anokiiwaad gii-wii-wawezhitoowaad gaa-agaasinjiwawezhichigaadeg, gaawiin wiin ini michaachingin. Gaawiin deminik wawezhichigaadesinooon. Anishaa izhichigewag. Nawach gichi-inenjigaade zhooniyaakewin apiich wiin ge-izhi-mino-bimaadiziwaad Anishinaabeg. Gaawiin gaye debwe weweni gaganoonaasiwag Anishinaabeg. Anishaa iwee izhichigewag ogimaag. Onandawendaanaawaa Anishinaabeg wiinawaa ji-gashkitoowaad ji-dibendamowaad aaniin ge-izhi-ganawendamowaad nibi. Daabishkoo gaa-gii-ikidowaad imaa gaa-gii-dazhinjigaadeg [*United Nations Declaration of the Rights of Indigenous Peoples*](#) (UNDRIP). Amii ge-izhiminoseg ikidowag Anishinaabeg noojimowin ji-debinigaadeg giishpin igi gaa-inendaagoziwaad ji-bamitoowaad nibi wiinawaa aaniish inendaagoziwag.



Dazhiikewining daa-onjiimagan dibendaagoziwin gaye anishinaabewaadiziwin.

Mii gaa-ikidowaad Anishinaabeg wiinawaa ji-ganawendamowaad nibi Anishinaabe gikendaasowin gaye anishinaabewaadiziwin gaye dibenindizowin ji-biminizha'igaadeg. Iwe Phase 2 gaa-ikidoomagak mii ge-izhichigeng **anishinaabekweg ji-niigaaniiwaad nibi dazhiikigaadeg**, mii iwe ge-minoseg. Abiwining amii ono abiwinan ge-aabadakin ji-doodamong ji-ayaag debwewin gaye ji-niigaaniiwaadigi gaa-inendaagoziwaad. Gaawiin daabishkoo noongom gaa-izhichigeng ogimaa gaa-gibitood izhichigewin igi g Anishinaabeg gaa-biminizha'amowad daa-biminizha'igaade mii iwe ge-minoseg. Webinigaadeg gaa-gii-bi-ayaamagak odaanaang da-onizhishin gaye ji-aabajichigaadeg gete-anishinaabe-ogimaawiwin da-onizhishin.

Gigiwidaapiwag o-gii-dazhindaanaawaa gaa-minoseg nongom. Ikwewa' gii-ozhitoowaad gaa-zhooniyaakemagak nibi gaa-nagajichigaadeg gii-dagwiiwaad izhichigewining dazhiikewining. Gaye gii-aabajichigaadeg gimiwanaabo. Anishinaabewichigewin gaye bagwadakamig gii-ondinigaadeg gikendaasowin gaye nibi nagamonan maawach da-onizhishin iwe dinookaan anishinaabewaadiziwin ji-aabajichigaadeg. Owe dash gidizhi-maanzhisemin. Gidimaagiziwin ayaa gaye gii-gichi-anokiiwaad awiyag gii-miigaanindwaa awiyag mii igi ikwewag maawach maa=maanzhisewaad. Onandawenimaawaan ogimaan ji-wiiji'igowaad. Mii gaa-ikidowaad wiinawaa Anishinaabeg ji-dibendamowaad aaniin ge-izhiwiiitoowaad nibi ji-bimaajichigaadeg nibi gaa-wii-bimaajitoowaad.

Ishkwaawaach giigidowin gaye Ge-doodamowaad.

Anishinaabekweg wiinawaa gaa-dibaajimowaad omaa aaniin gedoodamowaa ji-dibendamowaad wiinawaa e-inendaagoziwaad ji-naagajitoowaad nibi. Ge-izhi-onizhishing anishinaabewichigewin gaye manidoowiwin gaye ogimaawiwin ji-giiwe-ayaaying. Owe dash izhichigewin daa-ani-aanjise. NWAC oada-ozhitoonaawaa ge-aabajitoowaad gaye gikino'amaagewin Anishinaabe gikendaasowin ji-aabadak ji-dibenindizoying nibi anokaadamang gidazhiikewininaang.